



*Le pere reçoit le prodigue avec ioye de son retour, fait tuer le veau gras, & festoye ses amis.*

**A**INSI que la nécessité est maistresse des arts, aussi est-elle l'originè d'humilité : la nécessité auoit tant humilié ce fol prodigue, qu'elle luy fit de-laisser ses pourceaux, & retourner à son pere, qui le voyant venir de loin, fut émeu de compassion, & accourut à luy, se ietta à son col, & le baïsa. Lors son fils luy dist, Mon pere i'ay peché contre le Ciel, & deuant toy, & ne suis pas digne d'estre appelé ton fils. Alors le pere fit apporter la plus belle robbe pour le vestir, vn anneau pour luy mettre au doigt, & des souliers en ses pieds ; & outre ce, fit tuer le veau gras, pour faire bonne chere à ses amis, pour la ioye d'auoir recouré son fils qui estoit perdu. Or estoit son autre fils aîné aux champs, qui s'approchant de la maison, ouït la melodie que l'on faisoit, lequel ayant sceu l'occasion de cette ioye par vn des seruiteurs de la maison, & que le veau gras auoit esté tué pour la venue de son frere, en fut marry, & ne voulut entrer : mais ce bon pere sçachant ce mescontentement, sort dehors, luy remontrant doucement, qu'il ne falloit point se fâcher de cette rejoüissance, luy disant : Mon enfant, tu es tousiours avec moy, tous mes biens sont à toy, & ton frere qui estoit perdu est retrouvé. Esioys-toy donc avec nous.